



Ulloq 15. oktober 2008
Ane Hansen

Inatsisartut Suleriaasianni § 36, imm. 1. naapertorlugu Naalakkersuisunut apeqqut imaattoq matumuuna saqqummiuppara:

Inuit Ataqatigiit puisit amii pillugit isumasioqatigiinnermi ulloq 13. oktober peqataareerluta ima Naalakkersuisut apererusuppagut:

1. Puisit amiisa EU-p iluani eqquteqqusaajunnaartinniarneqalernerisa kinguneranik Naalakkersuisut qanoq iliuusissamik maannamut qanoq suliniuteqarsimappat?
2. Maannamiillu EU-parlamentip aaliangernissaa tikitserlugu Naalakkersuisut qanoq iliuuseqalersaarpat?
3. Paasititsiniaanerni sunniiniarnernilu nunatta Bruxelles-imi aallartitaqarfia sunik suliniuteqarsimava qanorlu siunissami pilersaaruteqarpa?
4. Paasititsiniaanermi sunniiniarnermilu Danmarkimi nunatta aallartitaqarfia maannamut qanoq atorpeqarpa siunissamilu qanoq pilersaarutigineqarfigineqarpa?
5. EU-kommission-ip eqqusseqqusiunnaarnissamut peqqussutissatut siunnersuutaa malillugu naggueqatigiit inuit, siunnersuummi immikkut akuerineqarlutik eqqussisinnaatinneqarnissaat periarfissatut Naalakkersuisut qanoq nalilerpaat?
6. Siunissami nunani allani ass. EU-mi aaliangiinerit annertuut, Danmark-imut isumaqatiginniarnermik nassataqartut pissatillugit Naalakkersuisut inatsisartunik peqataatitsinerunissamik pilersaaruteqarnerlutik, taamaassappallu pilersaarut tamanna qanoq isikkoqarpa?
7. EU-mi allanilu puisit amiinik nioqquteqaqqusiunnaarnissamik suliniutit pillugit nunatsinni paasisitsiniaasoqarnissaa qanoq pilersaarutigineqarpa?

(Landstingsmedlem , Inuit Ataqatigiit)

Tungavilersuut:

EU-p puisit amiisa eqquteqqusaajunnarnissaanik suliniartoqarnera Inuit Ataqatigiinnit malinnaaffigisarput, Inuit Ataqatigiit isumaqarpugut piniartortagut inuutissarsiornermikkut eqqornerlunneqarujussuarnissaat pinaveersaarniarlugu Naalakkersuisut ullumikkumiit annertunerujussuarmik sunniiniarneq ingerlanneqartariaqartoq, tamanna pillugu Naalakkersuisunut apeqquteqarpugut ullumikkut suliap killiffia nalilersoreerlugu aamma isumaqaratta Nunatta tungaaniit iliuutsit annertunerujussuusariaqartut.

EU-p puisit amiisa eqquteqqusaajunnarnissaanik siunnersuummik suliaqartoqarnerata ullumikkut ilaatigut Nunatta ammeriviata Great Greenland-ip annertuumik malugereersimavaa, tamannalu aamma nunatsinni piniartunut iliuutsit annertusineqanngippata kingunerluttussaasoq.